



Iran nung longkak aitba atema
Khamenei-i Trump aitsür

Sarfaz-i Vijay Hazare Trophy nung
half century tekaratiba yanglu



Tanü BPCC(Assam-Nagaland) senden amener

Dimapur, January 9, 2026

(TYO): January 10, 2026 anepdang 11:00 ako nung Border Peace Coordination Committee (Assam-Nagaland) kümshi lokti senden amenba den mungdang alitsü.

Iba sentong ya Bhagyalakhi Gandhi ME School nung alitsü aser state anaprong nungi teshimtet nübotem adentsü. Assam-Nagaland arrtsü anasa Changpang-Titabar circle nung iba school ya lir.

Mapang shia Naga aser Assamese nunger tsüngda mepetmesü adoka raratepba olemtep, kati ka angateta aser amalitep ajanga angatetteptsü nükjidong nung iba senden ayonger.

Iba senden nung arrtsülen alirtem ajak adentsü jaoker aser arrtsülen yimjung aser putepa alitsüba nung yariteptsü mepishir ta B P C C (A - N) - i metetdaksüogo.

NGISRSC aser WRI India tsüngda MoU sign sütep

Dimapur, January 9, 2026

(TYO): Nagaland GIS and Remote Sensing Centre (NGISRSC) aser WRI India tsüngda Memorandum of Understanding (MoU) ka nung sign sütepogo.

January 7, 2026 nü Nagaland GIS and Remote Sensing Centre, Kohima nung iba MoU nung sign sütep aser iba ajanga NGISRSC aser WRI India külemi yaritepa Energy Access Explorer (EAE) inyaktsü.

EAE ajanga Nagaland nung clean energy maparen inyaktsü atema high-priority areas jangjatsü.

"Iba MoU ajanga WRI India den asenok tesentaktep mera tasen ka agir. Iba tesentaktep ajanga Nagaland sustainable development atema teyari angutsü" ta Sr. Project Director,

NGISRSC, Er. Mhathung Kithan-iashi.

"Energy Access Explorer (EAE) ajanga tebilemba nungi mapa kümdaktsür. Energy maparen ulushiba dang masü saka EAE ajanga critical public infrastructure nung aser talisa health aser education sectors nung teyari tulu agütsür. Iba ajanga Nagaland-i terenlok bener arutsü inyakba nung nungiter aser India sorkari 2030 tashi nung renewable energy nükjidong ayuba aser 2070 nung Net Zero emissions atongtsüba nung yariteper" ta Executive Director, Energy Program, WRI India Bharath Jairaj-ia ashi.

Energy Access Explorer (EAE) ya Planners, Entrepreneurs, Government bodies aser Institutions ajanga amshiteter.

Nagaland sorkari Hornbill Festival atema HPC ka tentetogo

Dimapur, January 9, 2026

(TYO): Nagaland sorkari Hornbill Festival atema High Powered Committee Governing Body ka tentetogo. Iba ludeni Hornbill Festival dak sendakba maparen ajak ketdangsüa inyaktsü.

Iba HPC nung mendenji Chief Minister asütsü aser Deputy Chief Minister (Planning and National Highways) aser Deputy Chief Minister (Home and Border Affairs) na adentsü.

Maneni, Tourism and Higher Education Minister, Horticulture and Water Resources Minister, Art and Culture Advisor, Industries and Commerce Advisors aser Advisor to the Chief Minister nungertem iba luden nung züngsem asütsü.

HPC nungsa Chief Secretary-i Member Secretary inyaktsü aser pa den külemi Finance Commissioner,

Development Commissioner, Commissioner and Secretary (Tourism), Secretary (Art and Culture), Secretary (Industries and Commerce), aser Secretary (Horticulture) nunger züngsemtsü. Iba governing body nung Task Force for Music and Arts (TaFMA) chairman adentsü.

HPC-i Hornbill Festival dak sendakba maparen ajak atema telemtetbatem agitsü aser benjungmung nung corporate social responsibility (CSR) contributions aser sponsorships ajak reprangtsü.

Iba luden züngsemtem rongnungi Hornbill Festival atema convenor ka aser festival director ka shimtsü.

HPC-i Hornbill Festival dak alia Naga Heritage Village, Kisama nung music, culture aser ibala mesükba sentongtem agitsü atema telemtetbatem agitsü.

Delhi nung NE kaketshirtem atema Interim Committee ka tentet



New Delhi, January 9, 2026

(Agencies): Tripura nunger Anjel Chakma tepsetba sülen Northeast nunger kaketshirtem kümzüka ayutsü, temeten agütsütsü aser temetentem asoshi Interim Committee ka tentetogo.

January 8, 2026 nü Nagaland State Guest House, R.K. Puram, New Delhi nung Northeast student organizations aser associations külem senden ka amendang iba lemtet agia liasü.

Iba senden nung mendenji Naga Students' Union Delhi (NSUD) president D Sozio Mao liasü aser Northeastern region nungi kaketshir telok 17 nungi teshimtet nübotem aden.

Senden nung Northeast Students' Society, Delhi University (NESSDU) nung general secretary Abhilasha Saikia-i Interim Committee

tentetba aser nükjidong indang osangtem lemsatep.

Maneni, Delhi Chakma Students' Union (DCSU) president Bipul Chakma-i January 6 nü National Commission for Scheduled Tribes (NCST) ajanga ken o angadangba osang lemsatep.

Iba ken o dak sendakba nung Uttarakhand Police-i metokmeperi inyakba atema tebilemtsü abener ta Bipul Chakma-i ashi.

Interim Committee-i Angel Chakma asüba atema CBI enquiry asütsü takhangba agütsütsü, anti-racial discrimination laws akangakanga inyaktsü rongshitsü aser state balala nung SPUNER ama Northeast nunger kümzüka ayutsü atema special police units tenteta aotsü tayongzükbatem agütsütsü senden nung lemtetogo.

Interim Committee-isa NCERT textbooks nung Northeast indang putiotsü dendaktsütsü atema takhangba agütsütsü.

Delhi nung SPUNER tajungba ketdangsüa aotsü nüngdaker aser nübo peria maliba ajanga meinyakteter ta senden nung adenertemi jembitep.

Northeast kaketshirtem atema Interim Committee nung D Sozio Mao convenor aser Sikkim Students Association Delhi president Bindash Chettri aser Bipul Chakma na co-convenors inyaktsü shima liasü.

Maneni, Abhilasha Saikia aser All Bodo Students' Union Delhi president Hadungra Narzary na secretary inyaktsü shimtet aser senden nung adenba telok shia nungi teshimtet nübo kaka züngsem asütsü telemtetba agia liasü.

Konyak Union-i Jorhat nung atalokba aitsür

Dimapur, January 9, 2026

(TYO): January 8, 2026 nü Jorhat Highway Bypass nung Daily Sumo Vehicle anishir Tahngom Konyak amakba khukhua aitsür aser iba tatalokba atema nemjema bilemer ta Konyak Union (KU)-i metetdaksüogo.

Iba anogo asür Babul Saikia'er jabaso Nayanjyoti Saikia (38 yrs)-i nok ka amer Tahngom dak taochi mesayui aser kuli kecha melii amak. Tahngom-i pa gari nung passenger 10 anir Kohima nungi Assam adena Mon-i aodang iba lendong ajuru ta KU sangdong nung shia lir.

Pai dang par kibong mesür aser pa kinungtsü den tanur tila ana lir. Pa ya tang kanga mejungi yirur anepaludagi aser iba ama tashiyim inyakba ya ozüng alema dang masü saka meimchir temeten aser public safety anema lir ta KU-isa metetdaksüogo.

Iba tatalokba atema Jorhat Superintendent of Police (SP), Jorhat Police Station nung Officer-in-Charge-i anir par teloki mapang shitak nung mapa inyakba aser passenger tem kümzüka Mon-i yokba den mapa

tamajung inyaker apuba atema tenüngsang agütsür ta KU-isa ashi.

Iba mapa inyaker ya ozüng tesashitiba agi merenshitsüla aser tepuokdak nungi mechioktsüla ta KU-isa takhangba agütsüogo.

Konyak Union-isa Assam nunger dang state ana tsüngda yimjung nung külemi lia aotsü mepishia metetdaksüogo.

Assam sorkar aser bangdak ozüng amertemi highway patrolling süa security agütsütsü ayongzüker ta KU-isa metetdaksü.

BJP-i voter list nungi tenüngtem agientsü meranger: Assam opposition parties

Guwahati, January 9, 2026 (Agencies): Assam nung Opposition party temi police tsüngdang BJP anema ken o ka benokogo aser iba ya Assembly elections agitsü aliba jakdang voter lists nungi tenüng endoktsü merangba atema lir.

Iba joint complaint ya Congress, CPI(M), Rajgor Dal, Assam Jatiya Parishad, aser CPI(ML)L teloktemi Dispur Police Station nung benokogo.

Assam nung Legislative

Assembly constituencies (LACs) 60 nung voter tenüngtem agientsü atema State BJP president Dilip Saikia-i Cabinet Minister Ashok Singhal nem mapa lemozütsü ta parnoki tai tonglokja lir.

Assam nung tang electoral rolls indang Special Revision ka tagidak lir aser February 10 nü final list sayatsü sentong lir. Taküm March-April meta Assam nung assembly elections agitsü imlar.

January 4, 2026, nü Zoom meeting ka nung BJP lennirtemi party MLA tem dang nisung kar tenüng agientsü tetuyuba agütsü aser iba nung Saikia aser Singhal nati tongti shilem agiba kuli lir ta Opposition party temi ashir.

"Iba ya Opposition party tem yarir tenüngtem electoral rolls nung agientsü tasa tamajung ka lir. Electoral rolls nungi chichiba voters aika endoktsü tasa atonga inyakba nung iba ya shilem ka lir" ta Opposition-isa ashi.

Parnoki police dang video footage agitsü aser ozüng tapet kübok ken o benoka angadangtsü aser aibelenertem merenshitsü ayongzüko.

Nagaland Police recruitment rally tenzüker asemnü jungogo



Dimapur, Aenjeti/January 09 (TYO): Zunheboto nung Nagaland Police recruitment rally tenzüker asemnü buba nung chest number 1608 nungi 2645 tashi screening Police Reserve Ground, Zunheboto nung agia liasü.

Ajisüaka chest numbers screening asüba yagi candidates paikaji tendangogo ta ashir masü, kechiaser chest number agütsüba nungta tetsür tema dena lir ta ketdangsür temi jangjatsü.

Tetsür candidates atema recruitment process ya January 10, 2026 nü balaka agitsü.

Tajungba jung ketdangsütsü atema chest number ya meyoktepa agütsü, anungji shilem agiba aser screening asüba nung memangmangtsü asoshi parnoki jangjashija liasü.

Anogo aika agitsü aliba recruitment rally maneni sentong nung aliba ama tiptema ochishia agitar, ta ashi. Noklak nunga asemnü buba

Nagaland Police recruitment ya Parade ground, Noklak nung January 9, 2026 nü agia liasü.

Medical Standard aser Physical test nung temsüa alirtem ya Department Recruitment Board ajanga ratio latettsüba nung ajemdaker written examination asoshi shimtsü.

Written examination ya January 20, 2026 nü Christian High School, Noklak nung alitsü.

State nung Assam Rifles-i maparen balala inyak



Dimapur, Aenjeti/January 09 (TYO): Assam Rifles temi Rashtra Katha Shivir 2025-2026 nung adentsü asoshi takok ngua National Integration Tour ayongzüka liasü.

Linük nung lanurtem tsüngta telungjem, linük tejak tentetba aser sobaliba tesendaktep lidaktsütsü nükjidong nung ayongzüka camp nungya Dimapur nungi kaketshir 20 shilem agia liasü.

Iba tour nung kaketshir nem India tesem balala nung sobaliba aser yimya balala angazütsü maongka agütsü. Parnoki Rashtra Katha Shivir nung shilem agiba sülen New Delhi-i ao.

Iba mapang parnoki

Rashtrapati Bhavan, Parliament House, India Gate, National War Memorial ama tongtipang aser otsü aketba tesemtem semdanga liasü.

Parnoki item tesem sema jajaba sülen Dimapur-i meyipa shilangba mapang Assam Rifles temi pelashishia agizüka liasü.

Maneni Assam Rifles temi Phuchama yimtsüng nung mürekmejuba sentong ka yangji aliba aser temeket nung aliba nüburtem den lungjemer ayongzüka liasü.

Nüburtem ajangzüksü, libajen wazüka ayutsü aser mürekmejuba nung nüburtem nem awareness agütsütsü asoshi Assam Rifles temi

inyakba nung shilem ka ama iba sentong ya ayongzü.

Iba mapang Assam Rifles nungi sepaitemi yimdaklirtem den külemi nüburtemi amshiba tesemtem, lenmang aser tesem balala müreka liasü.

Libajen müreka ayutsü arok mapa lir ta angatetdakja aser security forces aser nüburtem tsüngta tesendaktep tashi itshitsü nükjidong nung iba sentong ya ayongzü.

Iba mapang yimdaklirtem nem mürekmejuba, jana timi indokba aser libajen mesamadaktsüi libaliruba indang angatetdakja liasü.

Iba sentong nung yimdaklir temia pelashishia shilem agia liasü.



Küm asem nung khen amungba 5 buba Catholic Association of Nagaland (CAN) mungdang January 9, 2026 nü St Xavier Parish, Jalukie nung tenzükogo. Iba mungdang ya January 12, 2026 nung tembangtsü.

Chümoukedima DPDB senden thinenogo

Dimapur, Aenjeti/January 09 (TYO): Chümoukedima District Planning & Development Board (DPDB) January 2026 atema senden thinenogo, ta sangdong

ka ajanga ashi.

DPDB züngsem ajunga dang senden amentsü anogo melenshiba ya khen lir metetdaksütsü, ta ashi.

DC Chümoukedima-i Republic Day atema senden ayonger

Dimapur, Aenjeti/January 09 (TYO): Republic Day 2026 anogomung sentong dak sendakba nung jembishinütsü atema Chümoukedima district kübok Heads of Office ajunga senden ka January 13, 2026 anüngdang 11:00 ako nungi tenzüka Deputy Commissioner,

Chümoukedima indang Conference Hall nung amentsü, ta DC Chümoukedima sangdong ka ajanga ashi.

Iba senden nung Heads of Offices ajunga adentsü ayongzüker, ta sangdong ajangasa ashi.

IGAR (N)-i Tuensang semdang



Dimapur, Aenjeti/January 09 (TYO): Inspector General, Assam Rifle (North), Major General Manish Kumar, SM-i January 9, 2026 nü Tuensang semdanga liasü.

Iba mapang pai Assam Rifles tem den sensaksem aka aser parnok inyakym reprangshima linük anüdoklen arütsü kumzüka ayuba nung parnoki bendanga agütsüba akangshia liasü.

Region nung telungpur telok balala nungi nüburtem kumzüka ayuba nung bendanga

agütsüba asoshi pai Assam Rifles personnel nem tenüngsang agütsü aser telungpur anema inyakba maparen nung saksalema alitsü ajungshia liasü.

Kasa mapang Inspector General-i Bethel Children Home, Tuensang nung tanurtem den sensaksea study materials aser chiyongtsü agüja liasü.

Iba mapang Assam Rifles temi health camps, educational outreach aser ki o jen yanglutsüba amala maparen balala lemsatepa liasü.

Guwahati CBI court kati Manipur nung nisung 6 anema ken o benok

Guwahati, Aenjeti/January 09 (Agencies): Guwahati nung aliba special CBI court kati Manipur nung May 2023 nung tetsür asem süoshi semzüksüba aser tetsür ana dak tashiyim amshia nisung telok kati shi nung medemba ken o nung tai tonglokja alir nisung asem anema ken o tejangja benokogo.

Special judge Chatra Bhukan Gogoi indang court-i January 16 nü ken o jembitsü anogo atakzüko, kong Manipur jail ka nung aliba nisung pezü densema tai tonglokja alir ajak tsüngdong arua adentsü. Tai tonglokja alir ana bail nung lir.

Special court yagi tai tonglokja alir anema ken o tejangja 15 benoka January 2 nü totuyuba agütsü. Iba ken o ya May 4, 2023 nü nisung lokti adenshia azüdokshia nisung asem süoshi semzüksür mangsa jajadaktsüba aser parnok rongnung nisung ana dak nisung telok kati tashiyim amshia shi nung medemba, aser iba timtem ajurur alir rongnung nisung ka kinunger tepsetba indang lir.

Mapang talangka lir video ka temai adoka social media nung prokshiba sülen iba tatalokba indang temai adoka liasü.

"Iba court-i tenük kuli

alirtemi ashiba aser documents densema tajung aser tamajung ajak asadangba sülen tai tonglokja alir ajungai mapa tamajung inyak ta kuli jangjateter," ta court ajanga ashi.

Anungji Indian Penal Code (IPC) indang ozüng kübok aser Scheduled Caste and Scheduled Tribe (Prevention of Atrocities) Act, 1989 indang penal provisions kübok tai tonglokja alir ajunga anema ken o benoker. Ken o tejangja zünga rateta ashiba sülen tai tonglokja alirtemi aibelen masü aser jembitsü ta ashi," ta court totuyuba nung ashi.

IPC indang ozüng balala kübok ken o benokba ya tepsetba, nisung teloki tashiyim amshia shi nung medemba, süoshi semzüksütsü tebilemba nung tetsür dak tashiyim amshiba mesüra merenshiba, ki o jen raksatsüba, nok-nü tesashi amshiba, Meiteis aser Kukis tsüngta tsükchitep adokdaktsüba aser nisung aliba tesemtem raksatsüba alitsü.

Parnok ya SC mesüra ST nisung ka süoshi semzüksüba, SC mesür ST tsür mangsa anir senzüba densema SC and ST (Prevention of Atrocities) Act, 1989 indang ozüng balala kübok ken o benok.



70 Buba AO KAKETSHIR MUNGDANG Anti Mungdang

Omen:

"*Alizüngtem Lüngkümshiba*"
(Strengthening Horizons)

13-15 AENJETI (JANUARY) 2026

CHUNGTHIA

Yimphoksur: Chungthia Students' Union



AKM KETDANGPURTEM

1. Sb. Lanutoshi Aier : Tir
2. Sb. Onenpong : Tatong Tir
3. Sb. Satemmongba : Tongti Zülur
4. Sb. Bangjungkaba Imchen : Repsem Zülur
5. Sb. Lanulemba Longchar : Shisaliok Zülur
6. Sb. Ayimakum Aier : Senotsü Zülur
7. Sb. Redesen Imchen : Sobaliba Zülur
8. Sb. Temlangsangba : Saisapong Zülur
9. Sb. Bendangnangba : Metetpela Zülur
10. Kr. Kumzükenla : Women Co-ordinator
11. Kr. Sademmenla : Women Co-ordinator

TRIBUNALS

1. Wb. Nungdokyang Aier, Tribunal General
2. Wb. Aodangnok Ozükum, Member
3. Wb. O. Wati Jamir, Member

SENIOR EXECUTIVES

1. Wb. Imlikumzuk
2. Wb. S. Bendang Aier
3. Wb. Lanunungsang Longchar

EXECUTIVES

1. Wb. Sentisoba
2. Sb. Molungoshi Longchar
3. Wb. Imliakum
4. Wb. Washimong Sadem Lkr.
5. Wb. Imchalemba Walling
6. Wb. Nukshitemjen Lemtur
7. Wb. Rangpennokcha
8. Sb. Temsunungsang Lkr.
9. Wb. Aoyanger Tzudir
10. Wb. Limayanger Imchen
11. Sb. Imlinungba
12. Wb. Akangmeren
13. Sb. Tongpangmangyang : President, OKM
14. Sb. Imlinok : President, LKM
15. Sb. Kajenkaba Aier : President, AKTM
16. Sb. Imomanen Tzudir : President, JKTM
17. Sb. Angemangyang : President, JKM
18. Sb. Pangertoba : President, TKM

AKM Hon Jubilee Monument
Longkhum

TONGTI TEJAOKER

Dr. Neiphiu Rio
Hon'ble Chief Minister, Government of Nagaland

MUNGDANG LAPOKTSÜR

Wb. S. Supongmeren Jamir
Hon'ble Member of Parliament, Lok Sabha & President, NPCC, Nagaland

MUNGDANG SHIBANGTSÜR

Wb. T. N. Mannen, IAS (Rtd.) Hon'ble Advisor & MLA
Law & Justice, Land Revenue, Govt. of Nagaland

ALAKTETA TEJAOKER

Wb. Metsübo Jamir, Hon'ble Minister
Rural Development & SIRD, Govt. of Nagaland

Wb. Temjenmenba, Hon'ble Advisor & MLA
Transport & Technical Education, Govt. of Nagaland

Wt. M. Imkongla Jamir, IAS, Resident Commissioner
Govt. of Karnataka, New Delhi

Wb. Limasunep Jamir, IPS, Special Secretary, Home
Govt. of Nagaland
(Tir, Ao Officers' Telungjem)

PANELISTS

1. Kr. Imkongnukla Ao, EAC, Longleng
2. Er. Lanuwabang, Director NIELIT, Kohima, Govt. of India
3. Wb. K. Temjen Jamir, Yim O Zülur, Tir YimYim
4. Rev. Dr. Wati Aier, Convenor, FNR

COMPERES

1. Sb. Benjungakum Longchar
2. Kr. Nichet Jamir
3. Kr. L. Kathyla Longchar
4. Kr. Toshirenla Imchen

RECORDER

1. Kr. Temsusenla Jamir
2. Sb. Akumyang Lemtur

AKM WAKO

Atsüketba Sentong (Flag Hoisting)

AO STUDENTS' CONFERENCE



ESTD. 1929

Motto: "For the Nation"



MUNGDANG KI

13 AENJETI (JANUARY), 2026

4:30 PM

Wako Atsüketsür : Tir, AKM

MUNGDANG LAPOKBA

Sentong

13 AENJETI (JANUARY) 2026 MAPANG: 5:00 PM

Mungdang Lapoktsür:

Wb. S. Supongmeren Jamir, Hon'ble MP, Lok Sabha
& President, NPCC, Nagaland

- Mungdang Saya : Chungthia Students' Union
- Sentong Lenir : AKM Mendenpurtem
- Sarasademtsü : Wb. Kikum Longkumer
Pastor, Kumlong Baptist Arogo
- Metetpela Mapang : Sb. Bendangnangba
Metetpela Zülur, AKM
- Tarur Pela-a Agizükba : Wb. Assamwati Longchar
Chairman, Chungthia Village Council
- Tajungshi O : Wb. Marsanen Imson
Tir, Ao Senden
- "Mera Taket Ao Kin" : Mungdang Choir
- Salem O : (a) Shri Ajit Kumar Verma, IAS
Deputy Commissioner,
Mokokchung
(b) Sb. Nuheymong Yimkhiung
President, ENSF
- Tayongzükbä O : Wb. Limasunep Jamir, IPS
Special Secretary, Home, GoN
(Tir, Ao Officers' Telungjem)
- "Ozü Sobaliba" : Dust & Gold
- Mungdang Lapoktsür O :
- Tatem Sarasadem : Sb. Imyapangba
Youth Pastor,
Kinunger Baptist Arogo

ANEPDANG SENTONG

14 AENJETI (JANUARY) 2026 MAPANG: 10:00 AM

Tongti Tejaoker:

Dr. Neiphiu Rio

Hon'ble Chief Minister, Govt. of Nagaland

- Sentong Lenir : Sb. Yimjungshing Sanglir
Tir, Delhi Ao Kaketshir Telungjem
- Lai Zünger Sarasademtsü : Rev. Ngangnen Longkumer
Pastor, Alempang Baptist Arogo
- Tir Ola : Sb. Lanutoshi Aier
Tir, AKM
- Salem O : (a) Sb. Mteisuding Heraang
President, NSF
(b) Sb. Zuchobemo Jungio
President, CNSA
- "Wala Washi Tepro" : Mungdang Choir
- Tajungshi O : Wb. Metsübo Jamir
Hon'ble Minister
Rural Development & SIRD
Govt. of Nagaland
- Temeja Ken : Note Grid, Mokokchung
- Tongti Tejaoker O :
- Tatem Sarasadem : Rev. Nungshi Pongen
Pastor, Aliba Baptist Arogo

I ba sentong takok angutsü
asoshi ajaki sarasadema atadi.

AO OSIII OJANG LUTET TETOKTEPBA SENTONG

14 AENJETI (JANUARY) 2026 MAPANG 1:00 PM

- Menden : Sb. Lanulemba Longchar
Shisaliok Zülur, AKM
- Sarasademtsü : Rev. L. Meren Kichu
Pastor, Sabangya Baptist Arogo
- Sobaliba Ayim Ken : Soyim Shisaliyimer Telungjem
AKM Educational Promotional Trust Award Agütsüba Mapang
- Tayongzükbä O : Wb. Temjenmenba
Hon'ble Advisor & MLA
Transport & Technical Education
Govt. of Nagaland
- Tetoktepba Mapang : Tanir, Ao Riju
- Tatem Sarasadem :

AONUNG SENTONG

14 AENJETI (JANUARY) 2026 MAPANG: 6:00 PM

- Menden : Wb. Nungdokyang Aier, Taoba Tir, AKM
- Tekülem Mapang : Rev. M. Laka Tzudir
Pastor, Chungthia Baptist Arogo
- Tajungshi O : Wt. Tianaro, Tir, Watsü Mungdang
- Ken ka : Kr. Aremsola
- Ni Ya Shiner : Wt. M. Imkongla Jamir, IAS
Resident Commissioner,
Govt. of Karnataka, New Delhi

Onük:

Tarutsü Lanusensor : Melenshiba Lima ka nung shisaluin,
Yimden yimsüsüba, Tongtepratepren, Tamangbaren aser
Shishilemba tsütsü lensayua aniba.

(Generation Next : Navigating Education, Politics, Media,
Religion and Entrepreneurship in a changing World)

Onir: Wb. Shilukaba Longchar, Taoba Repsem Zülur, AKM

O Lemtep Mapang :

Tatem Sarasadem :

OSANGTEM AGIBA MAPANG

15 AENJETI (JANUARY) 2026 MAPANG: 9:00 AM

- Sentong Lenir : AKM Mendenpurtem
- Lai Zünger Sarasademtsü : Sb. Wapang Imchen
Youth Pastor,
Lirmen Baptist Arogo

Agenda Azüngtsü Mapang :

OSANG AGIBA MAPANG:

- a) Tongti Zülur Osang
- b) AKM Survival Mokokchung
- c) AKM Corpus Fund Committee
- d) AKM Audit Osang
- e) Padmashree Nokdenlemba Memorial Volleyball
Trophy Trust Fund
- f) Mokokchung Law College Corpus Fund Committee
- g) Ao Milen Committee
- h) AKM Educational Promotional Trust Award
- i) Mokokchung Law College
- j) AKM Nation Builder's Society
- k) AKM Free Coaching and Relief Fund Committee
- l) AKM Naklu Ken Osang
- m) Pangzüng Luden Osang

O Lemtep Mapang :

Tatem Sarasadem :

MUNGDANG SHIBANGBA SENTONG

15 AENJETI (JANUARY), 2026 MAPANG : 5:00 PM

Mungdang Shibangtsür:

Wb. T. N. Mannen, IAS (Rtd.), Hon'ble Advisor & MLA
Law & Justice, Land Revenue, Govt. of Nagaland

- Sentong Lenir : AKM Mendenpurtem
- Sarasademtsü : Rev. L. Wapang Longchar
Pastor, Mekuli Baptist Arogo
- Mungdang Shibangtsür O :
- Ken Ka : Kr. Sentimongla
- Pangzüng Luden Osang :
- Melepzüng O : (i) Wb. N. Manen Pongen
Convenor,
AKM Planning Committee
(ii) Wb. Imkongnechit Jamir
Convenor,
Local Planning Committee

Nungtet Luden Osang aser AKM Ketdangpur Tasentem
Kulizüng agiba Mapang :

AKM Tasen Ketdangpurtem : Rev. Ponen Longchar
Atema Bendanga Sarasademtsü : Sr. Pastor, MTBA

AKM Tir O : (a) Menden Toktsür
(b) Menden Agizükur

"Tatem Salem" : Mungdang Choir

AKM 71 Buba Mungdang aser Küm 100 Ajungba
Benjungmong Penzü, Waromung Shisashir Telungjem

Sempet Saya Sentong :
Chungthia Students' Union



TIR YIMYIM YIMOBILEM (EDITORIAL)

DIMAPUR

KÜPTOKNÜ

AENJETI 10, 2026

Iran talenba nungi salanür

- P Tiamongba Aier

Iran Islamic Republic nung rongsenketzüng jenjang tia kanga mejungi akümba agi nübortemi linük ajungalen lungkak aita arur. Iran nung atomic program atema United Nations-i yaküm September ita nungi sanctions tanaben benoka liasü aser iba ajanga Iran sen 'rial' jenjang kanga mejungi kümogo. Külen, Iran-i parnok sasa "Axis of Resistance" ta ajaba linüktem aser telungpur teloktem ajunga makdokogo aser iba ya 2023 küm Israel-Hamas rara tenzükba sülen nungi lir. Iran-i timi lungkak aiterem tepsetra U.S-i parnok kümüzüki arutsü ta President Donald Trump-i tekümdangtsü ka shia liasü aser iba ya America sepaitemi Venezuela Tir Nicolás Maduro apuba ajanga shitak inyaktsü ta kuli agütsüogo. Nicolás Maduro ya mapang talangka nungi Iran den yaritepa arur ka lir. Iran kübok provinces 31 ajunga nung lungkak aitba sentong 340 tema agia arur ta U.S nung amenoka aliba Human Rights Activists News Agency ajanga ashir. Tang tashi nung lungkak aita arudang nisung 42 taküm samaogo aser 2,270 tema puogo ta parnokisa shiogo. Iran nung Supreme Leader Ayatollah Ali Khamenei-i lungkak aiterem azüoktsüla ta shiaka manendaktsüteter. Iran nunger sen rial jenjang kanga mejungi akümba ajanga rongsenketzüng tebilemtsü tulu ka ajurua lir aser shi, jang aser Iran nungeri sapua achiba chiyungtsütem nung 40% tashi jenjang tuogo. Külen, Iran-isa yaküm December ita nationally subsidized gasoline atema jenjang tasen latet aser alima nung jenjang dalangtiba gas nunga jenjang tua nübor nem khuret talila agütsü. Item tejashi den küm aika Islamic sorkar kübok timtem aruba tejashi bener tang Iran nungeri kanga sashia lungkak aiter aser sorkar atsüngdoktsü meranger. Yaküm December ita tatemlen Tehran nung shishilembartemi mezüng lungkak ait tenzükba liasü aser parnoki mezüngbo rongsenketzüng tebilemtsütem asoshi dang ola adok. Ajisüaka lia arudang lungkak aiteremi sorkar anema ola adoktsü tenzük. 2022 küm arishi küm 22 tain Mahsa Amini tepsetba atema nübortem kanga jashitepa aru. Iran'er "Axis of Resistance" mali kümogo kechiyong Israel-i Hamas tashimait kümdaktsüogo. Külen Lebanon nung Hezbollah nung tematiba tanishirtem Israel-isa tepsetogo aser tang iba telok timtem tia ka nung lir. December 2024 nung Iran-i pusema nungitba Syria President Bashar Assad atsüngdok aser Israeli o U.S. airstrikes ajanga Yemen nung Iran-i yariba Houthi telungpurtem amaker. Küm aika tejakdang Mideast nung Shah Mohammad Reza Pahlavi lenisüba kübok Iran ya United States den teyariteper ka liasü. Ajisüaka January 1979 nung nübortemi lungkak aitba ajanga Shah-i linük toktsür jena aotsüsa aküm aser Ayatollah Ruhollah Khomeini-i anir Islamic Revolution tenzükba Iran nung tang aliba sorkar amentet. 1980s nung Iran-Iraq raradang U.S-i Saddam Hussein pusema nungit aser iba rara nung U.S-i anogo ka amakdang tzüym nung Iran mapa meinyakteti aküm. Iba sülen nungi Iran aser U.S tsüngda tesentaktep tamajungba dang lia arur 2015 nuclear deal ajanga tesentaktep tera tajungba aküm. Saka Donald Trump-i 2018 küm iba accord nung U.S madentsü lemteta liasü aser idangji tesentaktep kanga mejungi raksa. Anungji Donald Trump-i ashiba amaji tensa mejungi kümra U.S-i lungkak aiterem yaritsüsa aser Ayatollah Khomeini pusemer mali akümba den tesüiba nung amshiba tashi pai mamshitetsüji Iran nunger taginüba atongtsü ama ajiteter. Iran nung lungkak aiter aikati Iran nung shah tatembangba'er jabaso Crown Prince Reza Pahlavi linüki meyipa arutsü ayongzüker aser pai ibaji mulunga agizükra pa lenisüba kübok Iran ketdangsüa aotsü ana nung dang lir kechiyong Reza Pahlavi-i Israel aser U.S den tesentaktep tajung yua lir. Islamic Republic sorkar atsüngdokra pai sorkar ka melenzükba nung yariteptsü renema lir ta Reza Pahlavi-ia metetdaktsüogo. Linük toktsür küm aika U.S nung lia arudang Pahlavi-i opposition teloktep aika tentetstsü meranga aruogo saka opposition teloktem tsüngda mangatettep aser Iran telung nung mapa sadema meinyaktetba agi pa tebilemba mataloki aruogo, ajisüaka pa pusemertemi Iran nung opposition lennirji pa dang ta shia pa linüki tanaben meyipa arutsü ajungmesor aser tanü Iran tensa reprangdangra Reza Pahlavi-i par linüki oa alitsü mulunga agizüktsü ama ajiteter. Yaküm December 28 nungi tenzüker Iran nung lungkak ait tenzüker joko hopta ana shi maneni dang arudar aser osang kar ajangabo Supreme Leader Ayatollah Khamenei-i linük toktsür jena aotsü sentong atongba angazüker. Anungji Mideast nung tensa tajungba akümstsü aser alima nung kiralongraba mapa ajema akümstsü mesüra anentsü atema Iran nung tanü nübortemi lungkak aitba nükjidadongtem ataloka Iran nunger nüjiso ngua sorkar tasen kati yimsü süa ao nung ajungtsü.

OLEMSABANG

Asenok küm tasen ka nung ayaokogo

L. Kika Pongener.

(Yashi adok nungi...)

Mungdang : Tanü asen lima nung mungdangtem tia reprangdangra, teimba ka tamang yimsu mungdang masü, saka mulongtet telok ka, mesura yimden bangdak tashi akaba telok ka mesuka küma odagi. Kanga tesasatsüka, tanü asen lima nung mungdang karbo mepetmesu tia nung aliba angudang kanga sasar. Ano mungdang karbo ketdangsuba mapa aser inyakyim nung nubur mulung masü; nuburi ashishitsüsa aniba/inyakba angudang nuburtemi kanga sasa-a bilemer. Tenzüker aser lennir shimyim nunga telok kari dang ajepbanger; parnok kija mulungba nung anir aotsü merangba angudang nuburtemi kanga sasa-a bilemer. Inyakyim aika nung nubur mulung masü ola adok-aka; lenniri nubur ola anga-a mali; tashiyim agi attsür aotsü merangba angudang nuburtemi kanga sasa-a bilemer. Kokrabangla, Mungdang ya telok kar kija mulungba nung aniba sabang ka masütsüla. Ano mungdang anitsü lennir/tekolak shimyim nunga arogopur ajunga lirumedema tenzüktetstsüsa inyakyimji lateta ayutsüla; kechiyung mungdang ya arogopur züngsem ajunga saru-molok agi alir. Mungdang ya alima dang tatishitsü tamajung sayuba sabang ka masü, saka tatishitsü tajung sayuba sabang ka asütsüla. Mungdang-ji Sorkar aser lokti-tentet ajak dang ochiba aser shitakba inyakyim inyaka sayuba sabang ka asütsüla. Anungji 2026 küm ya asen Naga lima nung mungdangtem meyipa reprangshiba aser yanglushiba küm ka sudaktsüdi.

Yimden : Asen Naga lima ya yimden aikati yimsu asüba linuk ka lir. Sorkar, yimtsüng Putu menden, jila Council, mulongtet telok (NGO) aika; aser nujiso bushir telok semer (30) junga lemsar alibaItem telok ajunga jagi yimsu asüba linuk ka lir. Atangji, alima nung yimden bangdak teimtiba agi yimsu asüba linukji asen Naga lima ya asütsü. Aser yimden bangdak ajak nungji saru-saji dena lir, item saru-saji jagi Naga nunger kibongtem ajak alener yua lir. Tema-telung saru onsaraba agi osettsüset aser chiyungtsü nung jenjang tupet atur; aser chiyungtsü aser osettsüset nung jenjang tali atuba jagi kibongtem dak mesuker aser sensak tia yidaktsür. Joko asen Naga nunger nuburtemi saru-saji agi laaktetogo. Nuburtemi nujiso dang nungipo saru-saji talenba nungi salatsüba taginuba tuluba kümogo. Jila nungi tenzüker yimtsüng level tashi nung yimden yimsusuba inyakyim reprangdangra, teimba ka nung ochimashi agi sunga lir. Tanü jila aser yimtsüngtem aika nung rongsen akar, tashi (Power) akar, sentsü-keter kari yimden yimsusuba bangdak tashi ajak ajepbanger, parnoki mulungba nung yimden aniba agi tilar, sensaker aser meshi-mejungertem ola madokteter. Jila aser yimtsüng terenlok mapa inyaktsü atema sorkar nungi anguba sen agi ochimashir yimsusur aser lennir kar dang ajangzüker aser takar akümer. Ibajagi jila aser yimtsüng aika terenoktsü tim merenloki rajang küma lir. Anungji 2026 küm ya asen Naga lima yimden bangdak aser lokti-tentet ajak nung yimsusuba inyakyim meyipa reprangshiba küm ka sudaktsüdi.

Loktiliba : Tanü asen Naga lima nung lokti-tentet zünger-mezüngma kümogo; aser item lokti-tentet ajak nungji saru-molok madenba ka danga mali. Mulongtet telok, senso telongjem, watsü telongjem, sungpo zünger, alu zünger, kidong telongjem, ilangtzür, yamala aika lir. Ano kin shia officer union, jila/yimtsüng ajak nung pensioner union, Co-op. societies, selp help groups, auto-rickshaw union, tilla union, service-walla union, etc. yamala aika lir. Lokti-tentetbo tashi taitba-taitba akümer; aser idangji kibongtembo tesensakba-tesensakba akümer. Nisung aika lokti-tentet onsara nung tanishir (Leadership) shilem agi ataba agi; pei kibongbo telungi lujen alur. Loktiliba soro jungdaktsütsü merangdang; pei kibong soro mejungi akümer. Loktiliba takar kümdaktsütsü merangdang; pei kibong sensak tia ayir. Loktiliba tejakleni anitsü merangdang; pei kibong tangar memenepi tesuleni aor. Joko Naga nunger nubur aikati item lokti-tentet saru-saji agi laakteta kümogo. Lokti-tentet ajunga nung lennir teimba kati yangko semer tenzüker. Lokti-tentet ajunga nung tanishir menden raktep dang nubur tsüngda nung tenukmeremtep, tarishitep, tsükchitep, mepetmesu aser telemsa adoker. Anungji yimden dak sendakba aser arogo dak sendakba lokti-tentet tongtipang kar dak alaka, kangabo menungdakba lokti-tentet karbo anena-adokba, aser mayu-ang tajungba asütsü. Kechiyong lokti-tentet onsaraba agi kibong aika sensak tia ayir. Kodang kibongtem sensaka lidir, linuk ka rongsenketzüng jenjang mejungi kümdaktsür aser sorkar-a dena sensakdaktsür. Anungji 2026 küm ya asen Naga lima nung loktiliba meyipa reprangshiba aser yanglushiba küm ka sudaktsüdi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

EU nung Bulgaria-i mezüנג senjang nung Khristan maitsü inoker



Aenjeti/January 09, 2026: Bulgaria linük-a European Union single currency nung adenba sülen Euro sen senjang (jandi) nung Khristan maitsü inokba mezüngbuba linükji Bulgaria kümogo.

1880 küm nungi Bulguria-i 'Lev' sen amshia aruba sülen Bulgaria-ia Euro sen amshitsü atema European Parliament-i agizükogo.

Joko tangbo Bulgaria nungertermi Europe nung aliba linük 21-i amshiba Euro sen

amshir.

Yaküm National bank-i agizükba ama Bulgaria nunger €1 senjang nungji Rila Monastery tenzüksang, St Ivan the Wonderworker noksa amshitsü.

€2 senjang nung "God protect Bulgaria" ajenloka lir aser Bulgaria St Paisius of Hilender noksa lir. St Paisius ya Aso 18buba mapang nung Orthodox Khristan putir ka liasü aser Ottoman yimsüsüba kübok tanela asentenshi mapang nung

shilem agir ka liasü.

EU nung Orthodox Khristan nütsüנג teimba aliba linük anaji Cyprus aser Greece na lir, iba sülen tasembuba linükji Bulgaria lir, ajisüaka EU senjang nung Khristan maitsü mezüנג amshiba linükjibo Bulgaria kümogo.

European Central Bank guidance kübok Euro sen 'notes' aser senjang teimbaka nung yimsü dak sendakba noksatem masü saka linüktem nung tongtimbang kiojentem noksa teimba amshir.

Küm Tasen salem lemsatepba mapang nung Bulgaria nung Patriarch Daniil-i, St Ivan the Wonderworker ya 'kodaker lenmang sayur ka aser teküzmzüker ka' ta metetdakja liasü.

EU Commission Tir, Dr Ursula von der Leyen-i, "Küm aika kanga meranga inyakba aser tayongzükbatem koktetba sülen euro nung züنگokba ajanga Europe nung Bulgaria nunger ola tashi itshitsü imlar," ta metetdaksü.

2025 küm tanur dak tim mesüi benshiba atema Khristan lenir 188 aitsü

Aenjeti/January 09, 2026: 2025 küm tenzükbaba sülen October 31 anogo tashi nung United States nung tanurtem dak tim mesüi benshiba atema Khristan lenir 188 nem tai tongloktsüogo mesüra aitsüogo, ta osang ka ajanga metetdaksü.

Journalist Evan Hurst-i, "2025 küm October 31 anogo tashi nung tanurtem dak tim mesüi benshiba tatalokba ken o 188 nung pastor tem, lanur lenirtem, putirtem aser Khristan

school tesayurtem nem tai tonglokja lir mesüra karbo aitsüogo," ta metetdaksü.

Hurst-isa, "Aiben right-wing Khristantemi LGBTQ+ nisungtem ya tanurtem atema lendong lir ta jembir, ajisüaka parnok ama nisungtem nem tai tonglokjaka item ama tatalokba mali," ta ashi.

Iba report sangdongba sülen anogo ishika tsüنگda California nunga Khristan youth pastor Joshua David Kemper anema

ken o ka benokogo. Arrshi küm 47, Kemper-i taküm March ita nungi July ita tsüنگda arrshi küm 15 tetsür ka dak aiben tim mesüi benshi ta tai tonglokja lir.

Tanurtem dak tim mesüi benshiba atema Khristan lenirtem aika nem tai tonglokja aliba mesüra ken o kar nungbo aija aliba dak sendakba nung Hurst-i, "Khristantemi pei chirnurtem kümzüksü atema nendaka inyaktsü nüنگdak," ta ashi.

Billy Graham Evangelistic Association-i outreach sentong aika agitsü

January 09, 2026: Taküm Billy Graham Evangelistic Association (BGEA)-i US nung dang masü saka linük aika nung Khrista osangtajung sangdongba sentong aika ayongzüka agitsü.

BGEA Tir aser CEO, Franklin Graham aser Executive tatong, Tir Will Graham na leniba nung BGEA-i United States nung aliba yimtitem nung dang masü saka alima tesem balala nung outreach sentong aika ayongzüka agitsü.

Franklin Graham ya nüنگtugu sayutsüنگir, asür Billy Graham'er jabaso lir aser Will Graham ya Billy Graham'er semchir lir.

2025 nunga BGEA-i ayongzükbaba sentongtem ajanga nisung meyrjang aikati Khrista agizükogo mesüra taküm bendanga agütsüogo.

"2026 küm Billy Graham Evangelistic Association-i linük nung dang masü saka bendang lima balala nung teimla aser tepela osang sangdongtsü, aser itemji Yisu Khrista den tesendaktep yangluba ajanga dang angutsü," ta BGEA ministry nung yimobliem zülur, Madysen Scarborough-i metetdaksü.

Scarborough-isa, alima

tesem balala nung nisung aikati timtem-tejashi aser azüنگmeyakba koktettsü atema telangzüba bushir mesüra taküm nung tetezü bushir, ajisüaka parnok melung asütsüsa kecha mangur, ta metetdaksü.

Laisa, 2026 küm ayongzükbaba sentongtemji Yisu Khrista dak rangloker agitsü; Khrista sür shia aruba ajanga tatok anguba aser tatem maka taküm alangzükbaba osang onoki sangdongtsü, ta metetdaksü.

BGEA-i, item sentong ayongzükbaba nükgidongji Tsüنگrem den tesendaktep ayutsü atema yimti balala nung alirtem ajungshitsü atema lir, ta metetdaksü.

BGEA-i mezüנג January 24-25 anogotem nung Southeast Asia nung aliba Cambodia nung 'Love Siem Reap Festival' ayongzüka agitsü.

Cambodia nung Khristan nütsüנג ishika dang lir (nütsüנג shilem 2) aser iba linük nung BGEA-i ayongzüka sentong nungji local Arogo 400-i yariteptsü.

South America nung Rev. Franklin Graham-i February 14-15 anogotem nung Argentina kübok Esperanza Ushuaia nung outreach sentong agitsü, iba

sülen March 7-8 anogotem nung Peru yimtiba Lima nung outreach sentong agitsü.

Peru nung ayongzkba sentofng nungji localArogo 700-i yariteptsü. 1998 küm sülenbo tang mezüנג Franklin Graham-i Peru yimtiba nung sayutsüنگitsü. Lima yimti nung nütsüנג million 11 lir. 'Chubatem yimti' ta ajaba yimti nung Graham-i 'Chubatem madak Chuba' indang sayutsüنگitsü.

March 21-22 anogotem nung Will Graham leniba nung Gulfport, Mississippi nung outreach sentong agitsü. Iba sentong dang 'Gulf Coast Celebration of Hope' ta ajatsü. Aonung ana tashi sentong nungji Khristan osangtajung kentenertem Charity Gayle, Terrian aser DOE nungeri shilem agitsü.

Iba sülen May 4-5 anogotem nung Will Graham-i Japan nunger asetkong Shikoku nung 'West Japan Celebration' sentong nung shilem agitsü. Iba asetkong nung Buddhist nunger tekülem ki 90 jungnüa lir.

May 17 nü Will Graham-i Uijeongbu, South Korea nung sayutsüنگitsü. 1973 küm Will Graham tebou, Billy Graham-i crusade tuluka ayongzüka agi aser iba sentong nungji nisung

ANOGO ABEN TSÜNGREM DEN

Tuluba akümtsü tarempzük

"Anungji Tsüنگremi mapang tetemsü nung nenok uludaktsütsü asoshi nenoki nenok sasa Pa tashi taitba kübok ajemalua kümang."

I Peter 5:6.

"" Adianutemi Yisu dang semtu benjung nung yimjak nung sayatenya mapa inyaktsü ajungshi (Yn 7:4). Yisui parnok dang langzüa ashi; "Kü mapang ano matong, saka nenok mapang teti renema lir" (Yn 7:6).

Pa adianui ajungshiaka Pai yimya tajung agi parnoki ajungshiba magizük. Yimya nisungi Tsüنگrem mapa mangateter, aser shi-i bilembaji Tsüنگrem anema tsükchir ta Pai meteta liasü (I Kor 2: 14). Sayutsüنگir aikati shi nisungi ajungshiba den medemdanga Tsüنگrem mapa inyakdang, Pai mulungba memeteti akümer. Shi jangraba nung tenzükdang tenzükbaba mapa aika teraksa kümdaktsür; Seraphimi pa tashikang agi tejak nembanger külemba jagi ajemalua Tsüنگrem tenzüksü lesson agütsür (Isa 6:2-3).

Takokji temalen nungi alutsü ta Yisui meteta liasü (T.Ken 75:6,7). Iba tangatetba nung tenem nung Pa atidangdang masü ta langzü (Mt.4:8-10). Tebui mulungba ama, Pa kibur ta angateta, Pa dang temekok ajak agi apudaktsü Tebu mapa mapang matong tashi aremzüka ata (Fil. 2:9-11). KodangYisui am pungo aser ango ana agi nisung meyi pungo dak tali mesüba angu, nüburi Pa chuba kümdaktsünü. Saka Pai Tebu mapang ataa aji magizük (Yn.6:15).

Tsüنگremi renema makaba nung nisungi temaba menden nung mendaktsütsü makok, mesüra nisungi Tsüنگremi mulungba menden nungi anizüktsü makok. Pei sasa ulubaji tejashitsü.

Oba, Nai mulungba aremzüka atatsü kü dang yariang.

million 3 dak tali dena liasü.

May 30-31 anogotem nung Spain yimtiba, Madrid nung BGEA outreach sentong agitsü. October 3 nü Manchester, England nung 'God Loves You Tour' agitsü. Taküm agi küm pongububa BGEA-i UK semdanga God Loves You tour agitsü.

Yaküm London nung ayongzükbaba God Loves You tour nung nisung 17,000 shi aden aser Arogo 550-i yaritepa liasü.

Scarborough-i, BGEA outreach sentongtem nung Yisu Khrista nem bendanga agütsürtemji local Arogotem den sendakteptsütsü, ta metetdaksü.

Iba dak alia BGEA indang Hispanic Ministries-i September 12 nü Houston nung Unidos Conference aser September 26 nü Chicago nung Unidos Conference ayongzüka katsütsü. Item sentongtem ya kiyongertem den Khrista osangtajung lemsateptsü atema US nung aliba Spanish oshi jembir tamangertem ajungshitsü asoshi lir.

BGEA-isa taküm küm parnok outreach sentongtem atema sarasademjang ta mepishia metetdaksü.

Iba küm ya Yisu Khrista den

tesendaktep yangluba ajanga teimla aser tepela angutsü asoshi kin ajak den lemsatepba mission küm ka asütsü, ta BGEA-i metetdaksü.

2027 küm nunga BGEA-i August 24-27 anogotem nung Sydney, Australia nung Asian-Pacific Congress on Evangelism ayongzüka akatsü. Iba sentong nungji linük 50 nungi Khristan lenir 2,500 shi jaoktsü. Alima nung tang tashi Khrista osangtajung mangashidangba nütsüנג aika aliba region balala nung Khrista osang proktsü nükgidong nung BGEA-i iba senden ayongzüksü. Anogo asemnü sendenji Asia aser Pacific nung aliba Arogotem atema kanga tongtimbang mapang ka asütsü, kechiyong iba senden nungji Khrista osang sangdongtsü atema lenirtem ajungshitsü aser nütsüנג billion 4 jungnüa aliba region nung tamangertem longjemmer inyaktsü atema bangjemtsü, ta parnoki metetdaksüogo.

Yaküm May ita nung Germany yimtiba, Berlin nunga BGEA-i ayongzükbaba European Congress on Evangelism kanga takok ngua agiogo. Iba senden nungji linük 55 nungi Khristan lenir 1,000 shi aden.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tsüngyatsüngkor

- (n) yin agi oset tapu balala yanglur, yintsüngir (blacksmith)
* Asen lima nung asen nisung tsüngyatsüngkor mali kümdagi.

Tsünü

- (n) azü mesükba arem shiruru (wolf)
* Tsünü shiruru yabo telok dang senzür.

OLONG PAITEP # 7379

1	2					3			4	
						5				
6				7						
								8		
9		10				11				
				12						
13									14	15
		16							17	
18										
				19						

TIPIEN

- Pongentsür dang ajaba- (7)
- An-i akoba - (5)
- Ta _ _ _ gka - (3)
- Pei indang aküm - (3)
- Tzü nung alir - (5)
- Talangba aküm - (3)
- Yangluzükli - (5)
- Ozü ka - (3)
- Songtem - (3)
- Ken yimya - (5)
- Kumtetdakba - (7)

LANGTSÜNGLEN

- Teimla ayu - (5)
- Ajir / Penzür - (9)
- O jembiba yimya - (3)
- Tali anguba - (9)
- Lokti tentet - (4)
- Itsük tzü - (4)
- Apitet - (5)
- Shishilembatsü atema amshiba - (3)

OLONG PAITEP # 7378 TELANGZÜBA

TIPIEN :

- Yiar, 3. Tesola, 7. Yimra,
- Tangar, 9. Peria, 10. Tanur,
- Tasen, 13. Lemjem, 15. Tambu,
- Khuret, 17. Sang.

LANGTSÜNGLEN :

- Yimti, 2. Amen, 4. Shiner, 5. Alaka,
- Satan, 9. Putet, 10. Tembar,
- Tatok, 12. Amang, 14. Jala.

NAI-A YA METETTER MA



India linük ken "Vande Mataram" mejemer küm 150 buba ajungba nungtem nung Tamil Nadi kübok SRM Institute of Science and Technology (SRMIST), Kattankulathur nung world record ka angutsü atema sentong ayonga agiogo.

Iba sentong nung nisung 3,032-i Largest Human Formation Depicting "VANDE MATARAM" otsü yanglutsü merangogo. Parnok rongnung kaketshir tem, tesayur tem aser non-teaching staff dena lir aser January 6, 2026 nü sentong agia liasü.

Bangladesh-i Assam nungi diesel 180,000 tonnes alizüksü



NRL TO SUPPLY 180,000 TONNES OF DIESEL TO BANGLADESH FOR RS 10 BILLION

Guwahati, January 9, 2026

(Agencies): Bangladesh-i taküm December ita tashi nung India sorkar meyong Numaligarh Refinery Limited nungi diesel 180,000 tonnes agütsü temelaba agütsüogo.

Bangladesh-i diesel alizükba nung 14.62 billion Taka shi agütsü.

Dhaka nung Finance Adviser Salehuddin Ahmed menden ser Advisory Committee on Government Purchase senden

ka nung iba lemtet agia liasü.

Sorkar meyong Bangladesh Petroleum Corporation ajanga totzü alizüksü aser senji BPC aser bank loans ajanga agütsüteptsü.

Oil India Limited indang subsidiary NRL den olemtep tembangba sülen import cost lemteta liasü. Totzüji \$119.13 million agi alizüksü aser iba ya base price \$83.22 per barrel nungi \$5.50 per barrel premium nung ajemdaker lir.

"Tesüiba sorkar kümsük mapang küm 15 tenangzüktep agia alilba kübok iba mapa ya inyaker" ta

Power, Energy and Mineral Resources Adviser Muhammad Fouzul Kabir Khan-i ashi.

NRL indang refinery ya Assam nung amenoka lir. Diesel ya Siliguri tashi bener aoer aser idak nungjagi December 2022 küm lapokba Bangladesh-India Friendship Pipeline ajanga Bangladesh dangi yoker.

Arunachal journalist temi pension scheme tenzüksü ayongzük

Itanagar, January 9, 2026

(Agencies): Arunachal Pradesh nung journalist temi state sorkar dang pension scheme tenzüksü rongshiogo. Cabinet-i mulunga agizükaka iba scheme ya küm pungu tashi meinyaki arur.

Arunachal Press Club aser Arunachal Pradesh Union of Working Journalists teshimtet telok kati Chief Minister Pema Khandu den ajurutept aser Arunachal Pradesh Working Journalists' Pension Scheme 2020 onük benoka lemsatep.

2019-20 state budget nung iba scheme tenzüksü sangokja liasü saka tang tashi mapa meinyaker ta parnoki ashi.

"Iba scheme ya Department of Information and Public Relations den kanga jembiogo saka bureaucratic level nung ashishitepba ajanga

tetsükdahtsü ajurur. Iba atema state nung working journalists-i tebilemtsü abener" ta APC President Amar Sangno-i ashi.

Parnokisa onük asem adenba memorandum ka agütsü aser iba nung Ziro, Aalo, Raga, Pasighat aser Seppa nung district press clubs pungu agizüksü shia lir.

Item district nung press club tem official recognition ajanga journalism akangshitsü aser district administration o media tsungda amalitep tajungba akümtsü ta parnokisa ashi.

District ketdangsürtem dang recognised district press clubs ajanga press conferences, media interactions aser workshops ajunga agütsü tetuyuba agütsüsüla ta journalist temisa metetdahtsü.

Parnokisa district press club tem asoshi ali mesüra tesem balaka agütsüsü atema

mepishia liasü. Tang district press club aika para ki nungi dang inyaksangshir ta metetdahtsü.

"Media ajanga sorkar sentongtem osang prokshiba aser administration o sensotem tsungda apu latsüba atema pelar" ta Chief Minister Khandu-i ashi.

Journalist temi benokba ken o tem jungjunga asadangtsü ta paisa nangzük. "Media aser sorkar mapa balala saka loktiliba tashitait kümdahtsüsü nükdjondgbo ka dang" ta CM Khandu-isa ashi.

Iba senden nung APUWJ General Secretary Sonam Jelly, district press clubs nungi teshimtet nübotem aser Secretary (Planning) R K Sharma and Deputy Director (IPR) Denga Bengia dena sorkar tongti ketdangsürtem aden.

Conrad-i police sub-inspector 76 nem appointment letters agütsü

Shillong, January 9, 2026

(Agencies): Meghalaya Chief Minister Conrad K. Sangma-i January 9, 2026 nü Meghalaya Police nung Sub-Inspectors 76 nem appointment letters agütsüogo.

Goeragre nung 2nd Meghalaya Police Battalion

nung sentong ka nung CM Conrad-i ketdangsür 76 nem appointment letters agüja liasü.

Mapa 76 atema applicants 21,000 tema liasü aser parnok competitive recruitment process ka ajanga shimteta liasü ta Chief Minister-i ashi.

CM Conrad-isa Sub-

Inspector tasentem dang nübortem yaritsü tejangraba aser aria bilema tenzüksü ayongzük.

Ketdangsürtemi pei mapa nung nendaka inyaksüla aser nenok nem tashi agütsübaji tangatetba tajung nung amshitsüla ta Conrad-isa ayongzük.

Senapati district nung ali hectares 12.9 nung poppy alu raksatsü

Imphal, January 9, 2026

(Agencies): January 6, 2026 nü Senapati Forest Division, district police, CRPF, Narcotics Control Bureau (NCB) aser Khabung nungi village volunteers külemi Upper aser Lower Khabung Hill Ranges nung poppy alutem raksatsüogo.

Iba mapang parnoki ali hectares 12.9 jungnüa nung poppy alutem raksatsü aser iba ajanga narcotics production nung kanga mejungi kongshiogo. Iba mapang aluyimertemi amshiba jen ka dena rondoktsü.

Ketdangsürtemi poppy lu

ayimertem maitsü jangjatsü, bushitsü aser aputsü atema maneni inyakdar.

Senapati district administration aser enforcement agencies-i nübortem dang drugs anema rara nung yariteptsü mepishia metetdahtsüogo.

GOVERNMENT OF NAGALAND

DIRECTORATE OF PRISONS

NAGALAND: KOHIMA.

NO.PRI/HQ/Ration-32/12 (Pt.II)

Dated Kohima, the th Jan' 2026

NOTICE

In supersession to this office Tender Notice of even number dated 16.12.2025 issuing of Tender forms is hereby postponed to 27.01.2026. The last date for submission of the tender forms will be on 10.02.2026. Tender documents will be opened on the same day at 12:00 Hrs at Prison Head Quarter.

Tender forms may be collected from the Office of the Prison Directorate, Kohima during Office hours on payment of ?1000/- as scheduled.

Sd/-
(RENCHAMO P. KIKON) IPS
Director General of Prison
Nagaland, Kohima

Cambodia-Thai ceasefire nung US-i sen \$45m teyari agütsütsü

Washington, Aenjeti/January 09 (Agencies): Thailand aser Cambodia tsüngta Tir Donald Trump tetsüngtai ia rara anentsü jembia aliba akangshiba nung yaritsü atema United States-i sen \$45 million jenjang teyari agütsütsü ta sangdongogo.

US assistant secretary for East Asia, Michael DeSombre-i Hokulbarnü ashiba agi, linük anati temesepba mozü shibelenba aser cyberscams azüokba nung yaritsü atema US-i sen \$20 million agütsütsü, koba Cambodia asoshi tebilemtsü tulu kumogo.

DeSombre ya yimjung tezüngzüktep mapa kuma inyaktsü atema Thai aser Cambodia ketdangsürtem den Hokulbarnü aser Honibarnü Bangkok aser Phnom Penh nung jembishinü akar, ta State Department ketdangsür kati ashi.

Tawa rara ajanga tesem balala nung prokshia aliba nüburtem yaritsü atema arütsü tensa tajungba kumdaktsütsü asoshi sen \$15 million agütsütsü aser de-mining aser 'unexploded ordnance clearance' atema sen \$10 million agütsütsü, ta DeSombre-i ashi.

"Kuala Lumpur Peace Accords mapa kuma inyakba nung United States-i Cambodia aser Thai sorkar maneni yaritsü aser par nübur aser region atema tesunep, yimchiyimjung meyiba arudaktsütsü atema lenmang lapoktsütsü," ta DeSombre-i sangdong ka nung ashi.

Kuala Lumpur Peace Accords ya Trump-i October ita Malaysia semdangba mapang linük ana tsüngta meyongnem agütsüba tezüngzüktep alitsü.

Taoba mapang rara aliba anentsü asoshi Trump aser Malaysia Ato Kilonser Anwar Ibrahim tetsüngtai ia yimjung lidaktsüba raksaba sülen Cambodia aser Thailand tsüngta arütsülen rara ano taoba ita tenzükshi.

Southeast Asian kidanger linük ana ya ano December 27 nü ceasefire ka sangdonga anogo 20 rara aliba anen, kong nisung 101 tepset aser linük anatsülen nungi nisung million tesadang ka dak tali pei ki yutsür tesem balala nung jenshia liasü.

Tang tesüsa yangluba ceasefire nung Cambodia-i aibelener ta Thailand-i tai tonglochtsü, saka iba tai tonglochtsüba ya mapang tatsüka lir meyipa agia

Cambodia sepaitemi aibelenba ya 'accidental fire' ka liasü ta rasaa ashitsü parnok den jembi ta Thai mitkari ashi.

Kasa mapang Cambodia-i Thailand dang Phnom Penh-i par indang ta ashiba arütsülen tesem kar nungi sepaitem ainshidaktsütsü ashi.

Linük ana tsüngta mapang talangka rara aruba ya France-i colonial-era mapang arütsü kilometer 800 asazüka yutsüba nungi lir, kong linük anaprongi tesem kar rakteper.

Trump-i rara aika anendaktsüba rongnung iba rara ya ka lir aser pa Nobel Peace Prize angutsü langa lir ta jembia liasü.

Trump tir akumba sülen demining atema Cambodia nem mapang talangka nungi teyari agüja aruba soitba densema bendang linük balala nem teyari agüja aliba ajemdaktsü.

Southeast Asia nung scam centres lapoka senotsü tsütsü külakoktsüba mapa inyakba nung US senso dak tenük yoka arur.

Thailand ya mapang talangka nungi US tembar lir, aser US-i par tsükchir China nungi Cambodia mesüzüktsü mechi tesendaktep tajungba kumdaktsütsü meranger.

Russia-i kangabo mamshiba Oreshnik missile amshia Ukraine amak

Kyiv, Aenjeti/January 09 (Agencies): Russia-i Brehostibar aonung Ukraine amakba mapang Oreshnik ballistic missile amshia liasü.

Brehostibar aonung Kyiv nung nisung pezü tepset aser 25 yiru, kong ghonda ishika ola tulu adoka apokba angashi aser iba mapang anüng sangwadaktsü.

Moscow-i Oreshnik amshiba ibai tanaben alitsü, koba November 2024 nung Dnipro yimti amaktsü asoshi mezüng amshia liasü.

Russia indang defence ministry ajanga ashiba agi, December ita tatemlen Vladimir Putin'er ki nung tenük yoker Ukraine-i drone amshia amakba nung langzüa amakba lir ta ashi.

Parnoki Oreshnik indang nükjiding tejangja mashi, saka ayatirm atongtsü lia social media nung video tem prokshiba nung anüolen Lviv

yimti tezülen tesem balala nung apokba sayua liasü.

Tir Volodymyr Zelenskyy aser Ukraine ketdangsür temi Poland arütsü nungi mile 40 shi pilar Lviv nung ballistic missile ka khaloktsü ta ashi.

Oreshnik ya intermediate-range, hypersonic ballistic missile ka lir, kobai meta mile 3,417 tashi tongteter. Iba missile nung aliba warhead ya alileni aludang ajasa aor aser mapang kasashi nung tanen makai apoker.

"EU aser Nato arütsü anasa iba ama amakba ya European continent indang security asoshi tebilemtsü aser transatlantic nung alirtem tendangba lir," ta Ukrainian foreign minister Andrii Sybiha-i ashi.

Ibai Putin mangpomangyimba nung telangzüba agüja amakba lir, ta pai ashi, koba December ita tir aliba ki nung drone amshia amak

ta tai tonglochtsüba indang alitsü.

Drone amshia amakba nung temulung malemer ta EU-i idangjisa ashi aser taoba hopta Donald Trump-ia iba ama mamak alitsü ta shia liasü.

Hokulbarnü EU foreign policy chief Kaja Kallas-ibo Russia-i Oreshnik amshia amakba ya Europe aser US asoshi tekumdangtsü lir ta ashi.

"Putin-i yimjung maginer, bendanger den tesendaktep nung Russia telangzüba ya missiles talila aser teraksatsüba dang lir. Asenoki Ukraine yaria meraksatsü tashi Russia-i iba ama amakba ya manentsü," ta lai X nung zülü.

Oreshnik den ballistic missiles 13-i energy facilities aser civilian ki o jen nung tenük yoker khaloktsü aser iba den cruise missiles 22 aser drones 242 liasü ta Zelenskyy-i ashi.

Kati Qatari embassy nung ki ka raksatsü, ta pai ashi.

MULUNG NEN O

ASO :
09.05.1930

ASU :
03.01.2026

Alima nung kecha dena medemdangtsü makokba temeim Ojala R. Imsüla (Asangma) arishi küm tukutrok taküm alidang aser la alima nung arishi tatembangba anogo tashi, Arogo, Yimden aser kija kibong shirnokisa ozü shisabulu khuret agi neneter nüktzü yima alidang mulung süneptsüba den külemi mapang, nübu, rongsen aser sarasadem agi onok nongita yariogo nenok ajak dang ozü mulungjang taroktiba nungi kanga pelaba iba osang kaket ajanga lemsateper. Tanela aser alishi nung timtema okronga alibapur yaritsü Tsüngremi nenok maneni moajangma.
~ Temeim Jalajabaso, Semchisemnur, Kidangkimgang.

PUBLIC NOTICE

Registered Office: ICICI Bank Tower, Near Chakli Circle, Old Padra Road, Vadodara- 390007
Corporate Office: ICICI Bank Towers, Bandra-Kurla Complex Mumbai 400051

GOLD E-AUCTION CUM INVITATION NOTICE

Tsünglanglen shia aliba sen apur dang gold ornaments ("Facility") melen ICICI Bank Limited ("ICICI Bank") nungi parnok sen apua aliba menokang ta metetdaktsü. Parnoki apua aliba memonoktet nung onoki züngzüktepa aliba gold ornaments tem January 21, 2026 nü E-Auction asütsüsa akumer. Jelia osang magütsü account agientsü/E-Auction anogo melentsü ICICI Bank dak tashi lir. Auction ya online-https://jewel-auction.procuretiger.com nung nikongdang 12:30 nungi 3:30 tsüngta alitsü. Terms and conditions tejangja website nung angutsü. Sen apur sür alinunga, conditions ajunga senmanger den kasa alitsü.

Loan A/C No.	Customer Name
Branch Name: Lumding	
263562000970	Bikash Das

Date : 10.01.2026
Place : Dimapur

S/d Authorised Officer
For ICICI Bank Limited

Iran nung longkak aitba atema Khamenei-i Trump aitsür

Tehran, Aenjeti/January 09

(Agencies): Iran nung Longkak aitba nüburtemi maneni longkak anendaktsütsü mechi ketdangsür temi Brehostibarnü internet shibangtsü, koba Hokulbarnüa liasü aser phone system majung aser airlines temia tayimtsü thiogo.

Hokulbarnü Iranian state TV nung sayuba nung Khamenei-i longkak aiter dang tekumdangtsü ashi, koba bendanger tsükchir, talisa United States ajanga tasa yangluba lir ta ketdangsür temi tai tonglochtsü, aser mepetmesü adokba ketdangsür temi bushitsü ta nenshia ashi.

Longkak aitertem ya US Tir Donald Trump tenüng nung inyaker ta Khamenei-i tai tonglochtsü aser ki o jen raksatsür temi nübur amshiba ki o jen amaker ta ashi aser bendanger asoshi taa agia inyakba nüburtem nem Tehran-i tatok magütsütsü ta ashi. Trump kabu nung Iran nunger azü melanga lir ta pai tai tonglochtsü.

Tehran-i iba tensa maziükteti tim atemer, koba December 28 nü tenzüker longkak aiter aika aser security forces züngsem pezü takum samaogo.

Tir Masoud Pezeshkian-i atsüanem akatsü aser tejangja metokmeperi angashitsü sorkar dang ayongzü, aser dangar temibo ketdangsür temi tatok magütsütsü aser longkak aitba nung bendanger tsükchir temi teyari agütsür ta ashi.

Rongsenketzüng tsütsü timtemba mechi longkak aitba ya Tehran shopkeepers temi tenzü, shirnok Iran nunger sen rial jenjang ajema akumba

ajanga jashi.

Longkak aitba anendaktsütsü mechi ketdangsür temi Brehostibarnü internet shibangtsü, koba Hokulbarnüa liasü aser phone system majung aser airlines temia tayimtsü thiogo.

Ajisüaka activists temi video lemsatepba nungbo longkak aiter temi Tehran aser danga tesemtem nung yimtung nung jana agi sünger alidak mi apua sorkar anema yimyim ayima liasü.

Longkak aitba nung ola madoki lia arur Hokulbarnü Iranian state media ajanga US aser Israel indang "terrorist agents" temi mi jangrudakja mepetmesü adokdaktsü ta tai tonglochtsü. Nisung asü-amaba lir ta parnok ashi.

Trump-i Brehostibarnüa Tehran-i longkak aiter temsepba par linüki memelatsü ta nenshia ashi.

Iran dang ajang-ajanga shiogo... parnok aji inyakra, parnok taa menoktsü, ta pai osangbener dang ashi.

Ajisüaka US tiri Iran nung pei sasa "Crown Prince" ta ajaba Reza Pahlavi den ajuruteptsübo mashi aser Tehran nung sorkar lao ka asünunga temelener ka Washington-i bhukumtsü renema mali ta ashi.

Pahlavi ya Iran indang shah tatemsabar jabaso lir, shiba 1979 nung Islamic revolution ajanga laodaktsü, aser pai tali longkak aitsü ayongzüka liasü.

Khamenei-i TV nung jembidang, longkak aiter ya danga linük ka tir peladaktsütsü atema pei yimti raksar, ta ashi.

50th Imtimeren Memorial Open V/ball Tournament Lion's Club Longsa B-i benogo



Longsa Yim, Jan. 9, 2026

(TYO): Longsa Sports Association (LSA) tenteter küm 50 abensaba den 50 buba Imtimeren Memorial Open Volleyball Tournament 2026 January 8 & 9 anogo ananü yangi Longsa yimdak Salang Lenden nung asaya-a mungogo.

Tesüsabuba asaya Lion's Club Longsa B o Changtongya Volleyball Association (CVA) na asayaba, Lion's Club-i points

25/21, 19/25, 31/29, 23/25, 15/6 agi koka taküm iba asayamung parnoki benogo.

Takoker telok nem senpet sen 100,000/-, atongdakba nem 60,000/- aser semifinal nung tsüker Fighting Peace aser Eagle Club Longsa nem 20,000/- (each) senpettsüogo.

Nija senpet parnok yagi agizük;

Player of the tournament - Temjensoba (Fighting Peace)

Best Spiker - Bendangtemsü (CVA)

Best Setter - Limatenzük (CVA)

Best Libero - Chubamanen (Lion's Club Longsa B)

Taküm iba asayamung nung telok 8-i shilem agi. Asayamung shibangba aser senpet agütsüba sentong nung tetushi tesemdanger Lok Sabha MP, S Spongmeren Jamir arua meraketsü.

Aong Reju Sporting Association küm 50 jungogo



Dimapur, Aenjeti/January 09 (TYO): Aong Reju Sporting Association (ARSA) küm 50 ajungba Hon jubilee Mopungchuket nung mungogo.

Iba sentong nung Nungsang Aier, Dimapur ajanga "Putusen den jangyumedem" onük nung ajemdaker jembidang telungjem, sobaliba tera aser lenla ajak nung terenlok indang jembia liasü.

Pai lanurtem dang sobaliba nung tera ayangtsü aser alima terenlok aser tejakleni aoba nung anidaktsü ajungmeso.

Telungjem ya zülubanglu

nung amshiba kisüing masü, saka mapa nung inyakba aser tekolok nung züluoka ayuba indang lir, ta ashi.

Lanurtemi taintem nem aliba terenlok angatetdaksütsü nungdaker ta Nungsang Aier-i ashi aser kasa mapang tanü lima nung innovation aser entrepreneurship nungdakba indanga ashi.

Pai lanurtem dang skills yangertsü aser yoktetsüsa oset yanglutsü ayongzük.

Dimapur nungisa Imkong Aier-i tajungshi o jembidang, skill development aser practical

education tongtipang lir ta angatetdaksü. Pai lanurtem dang lokti nung shilem tajung agiba nung rangloksü ayongzüka liasü.

Kohima nungi Suzulemla-i educational award atema tenüngsang agütsü aser ARSA-i shisaluyim, art aser saisapong nung ainba asoshi pelaba lemsatep. Pai lokti dang ochishia alitsü ajungshia liasü.

ARSA tir Imlikumzük-i jubilee muner pela agizükba o jembi aser Rimachang Aier, Convenor, Planning committee ajanga melepzüng o jembi.

Phek area wrestling meet nung melangteper 51 tokteptsü

Dimapur, Aenjeti/January 09 (TYO): Phek Town nung January 10, 2026 nü agitsü aliba Phek Area Wrestling Association (PAWA) indang 29th Senior & 1st Under 15 Wrestling Meet 2026 nung melangteper 51 tokteptsü. Item rongnung senior category nung melangteper 38 aser Under 15 nung melangteper 13 alitsü.

Ground management team - Khutsokhuno Baptist Church ajanga nisung 8000 shi amentsü menden anepalua lir. Sentong ya anepdang 8:30 ako nungi tenzüksü aser sentong akhumdong ka ama MLA Kuzholuzo (Azo) Nienu adentsü.

Iba tetoktepba nung chief referee Hukhoneyi Soho alitsü. Ticket jenjang donor sen 5000, chair (3 category) sen 2000, 1000 aser 500 alitsü aser gallery nung amentsü atema sen 200 alitsü.

PAWA indang inti mungdang Phek Town Council Hall nung Hokulbarnü agia iba tetoktepba yimya tajung nung ayongzüka agitsü pangjema liasü.

Maneni iba senden nung PAWA executive council nem 1st Phek Area Open Wrestling Championship 2027 ayongzüksü mapa nungloksü aser 2026 küm wrestling training/coaching camp ayongzüksü lemtet.

Sarfaraz-i Vijay Hazare Trophy nung half century tekaratiba yanglu

Aenjeti/January 9, 2025

(Agencies): Sarfaraz Khan-i pa koda ajung aji sayua Vijay Hazare Trophy nung otsü tasen ka yangluogo, ajisüaka iba asaya nung Mumbai team-i Punjab mekoki liasü.

Domestic asayamungtem nung kanga junga asayaka pa New Zealand den ODI asayamung atema meshim aser Test nunga asayatsü maongka mongui arudar, ajisüaka pai Vijay Hazare Trophy round 7buba nung ball 15 nung dang half century ka yanglua otsü tasen ka yangluogo.

Taoba mapang iba record ya Baroda nungi asayar Atit Sheth-i bener liasü. 2020-21 season nung Chhattisgarh den asayaba mapang pai ball 16 nung half century yanglua liasü.

Batting ameni ili nungi Sarfaraz-i ball kanga junga züka asaya aser pai Abhishek Sharma indang over ka nung run 30 yanglua liasü. Pai ajak senteper ball 20 nung run 62 yanglu, kong four tenet aser six pongu azükba densema lir. Ajisüaka pa Mayank Markande-i out süja liasü.

Sarfaraz-i kanga junga asayaka Mumbai puri temulung amasatsüka run ka agi asaya mekoki liasü.

Asaya akoktsü atema run 216 nungdaka Mumbai team batting amen tenzük saka Angkrish Raghuvanshi aser Musheer Khan na run 23 aser 21 dang yanglu out süatok. Sarfaraz-i kanga junga asayaba ajanga team jenjang junga kümdaktsü saka pa out asüba



sülen tanga asayartemi junga masayatet. Captain Shreyas Iyer-i team jenjang yanglushitsü meranga asaya aser pai run 45 yanglu, saka pa-a Markande-i out sütsü.

Iba sülen lower middle order temi junga masayatet. Suryakumar Yadav, Shivam Dube aser Hardik Tamore nungeri run 15, 12 aser 15 dang yanglua liasü.

Punjab team nungi Mayank Markande aser Gurnoor Brar nati wicket pezüzü agi aser Krish Bhagat aser Harnoor Singh natia wicket kaka agia liasü.

Mezüng batting amenba sülen Punjab team-i run 216 yanglu. Parnok rongnungi Ramandeep Singh-i ball 74 nung run 72 yanglu aser Anmolpreet Singh-i ball 75 nung run 57 yanglua liasü.

Mumbai bowler tem rongnungi Musheer Khan-i wicket asem agi aser Onkar Tarmale, Shivam Dube aser Shashank nungeri wicket anana agia liasü.

Iba asaya run ka agi akokba sülen Punjab team Group C nung temaba jenjang nung tembangogo. Punjab aser Mumbai naprongla Vijay Hazare Trophy quarter-finals atema qualify süogo.

BILEMDANGANG

"Peria akartemi sensakertem tim atemba mangateter."